

26. august 2014

UKA 2014/102

Inatsisartut suleriaasianni § 33 naapertorlugu matumuuna Inatsisartut aalajangiiffigisassaattut siunnersuut imaattoq saqqummiuppara:

**Raajanut qaleralinnullu licensit killeqanngitsumik piffissalerlugit pigineqartarnerisa, ukiunik tallimanik sioqqutsisumik ilimasaaruteqarnikkut killilerneqartarlersinnaanerit siunertaralugu Aalisarnej pillugu Inatsisartut inatsisaat allanngortinneqarsinnaanersoq - aningaasaqarnikkut kinguneqaatissat ilanngullugit - Naalakkersuisut UPA2015-imi saqqummiussassamik misissueqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaqa Nikolaj Jeremiassen, Siumut)

#### **Tunngavilersuut:**

Siunnersuutip tunngavigaa, raajartassat qaleralittassallu sapinngisamik tamanut iluaqutaanissaat. Ullumikkut raajartassat qaleralittassallu inunnit ataasiakkaanit selskabiniillu ataasiakkaanit pigineqarput, taakkualu pisassat akeqanngitsumik tunniunneqarnikuugaluartut ilaatigut raajarniarunnaarsimasut qaleralinniarunnaarsimasullu tunisarpaat, taamaalillutillu pisassiissutit aningaasariutigalugit. Maanna aalisarnermut inatsit atuuttoq malillugu raajartassanik qaleralittassanillu pigisaqartut pisassatik qaqugorsuarmut pigisinnaavaat, tamannalu isumaqarpunga kukkusumik aaqiissuussinerusoq.

Ullumikkut aalisartut inuusuttut aalisarnissamut pisassanik pissarsisinnaasannigillat, tassunga tunngavilersuutigineqartarluni pisassanik agguaaassasaqannginnera. Inuusuttut aalisartut pisassanik maannamut tunineqartanngitsut siunissami aaqiinnikkut raajarniarnissamut qaleralinniarnissamulluunniit periarfissinneqartariaqarput.

Iisimavara aalisarnej pillugu inatsit malillugu licensit naapertuuttumik sioqqutsilluni ilimasaarinnikkut killilerneqartarlersinnaasut. 1990-imi Inatsisartut immikkut ittumik taasinertigut aaliangersimavaat ukiunik tallimanik sioqqutsisumik atorunnaarsitsinissamut ilimasaarnej naapertuuttusoq. Taamaalionikkut pisassat agguaaateqqinneqarsinnaalissapput.

#### **Siunnersuutip aningaasatigut allaffissornikkullu pisortanut kinguneqaatissai**

Misissuineq allaffissornikkut aningaasartuutaanissaa naatsorsuutigineqarpoq, tamanna ukiup affaanik sulinermik naleqassaaq (250.000 kr. missaani).

#### **Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai**

Misissuinerup kingunerissappagu licensit killeqanngitsumik pigineqartut killilimmik pigineqartalernissaat, taava naatsorsuutigineqarpoq tamanna namminersorlutik inuussutissarsiuteqartunut aningaasaqanikkut kinguneqaateqassasoq. Aningaasaqarnikkut kinguneqaatissat misissuinerup inernerani takuneqarsinnaassapput.

**Siunnersuutip innuttaasunut allaffissornikkut aningaasatigullu kinguneqaatissai** Soqanngilaq.